


Parché sia Nadale tuti i giorni



Padre Ezechiele Ramin.

El Nadale da senpre el xe na festa che ne fa pensare a la pase, na ocasion par métare da parte invidie e rancori par gòdarse qualche dì de boni propositi. Anca quello che se se augura a Nadale xe che ogni dì sia come questo: che ogni omo su sta tera viva co bontà, co lealtà e respeto ne i so confronti e verso i altri, volendo par tuti giustissia, benevolenza e comprension. A xe proprio par questo che in ocasion de ste feste a vojo ricordare do persone, do preti padovani, che i ga sacrificà la so vita in Brasile, proprio parché i se gheva impegnà che fusse par tuti Nadale ogni giorno: padre **Ezechiele Ramin** e don **Ruggero Ruvoletto**, che i xe stai ricordà qualche mese fa ne la nostra Diocesi.

Padre Ezechiele (Lele pà i amissi) el jera un prete Conbonian, nato a Padova ne la parochia de San Giuseppe e, fàtose prete, el xe 'ndà in Brasile dove a soli 32 ani el xe stà copà da de i sicari de un latifondista de San Paolo. El se jera senpre impegnà, combatendo chi 'ndava contro la giustissia e la lege; anca qua in Italia prima de partire par el Brasile el gheva organisà na marcia contro la camora. Cò l'è stà in Brasile, a Cacoal, nel stato de Rondonia in meso a la foresta de l'Amassonia, el fonda el movimento de i "Senza Terra" e el difende i Indios Surui contro chi, in nome del progresso e de la civiltà, ghe ga portà via le tere che ghe dava da vivare a lori.

Dissenbre 2010

Par pi volte el vien minacià de morte da chei riconi senza scrùpoli, tanto che dopo 'ver predicà in cesa contro de lori, in testa a na smanà de fameje e jutà da de i sindacalisti, el ga ocupà na fazenda e, parché no sucedesse un sterminio de sta zente, el li convinse a no usare le armi e la violensa par avere giustissia, ma trattare in bona armonia. Però, tornando verso casa, de i kiler, pagài da i potenti del posto, i lo ga massà co na strejada de fusiade. I indigeni Surì, parché el so corpo no 'l vignesse portà via da i so assassini e magnà da le bestie de la foresta, i lo ga tendùo par na note e na giornata intiera, pregando, fin che no xe rivà i preti a tòrselo.

Sto ano, el 24 de lujo xe stà ricordà i 25 ani da la so morte e anca el Comune de Padova ga vossùo ricordarlo co na mostra de disegni che p. Ezechiele gheva fato par passion: disegni de sène ispirà al Vangelo e tra i so indios de l'Amassonia. E par ultimo, senpre el Comune, el ga inaugurà un asilo, intitolàndolo al so nome.

Par sto anniversario, don Fernando Ficon, pàroco de la parochia de San Giuseppe, el ga organisà un viajo, pelegrinajo, in Brasile dove co na trentena fra parochiani e preti de la Diocesi i xe 'ndài a ricordare sto martire proprio là dove che 'l xe stà copà e in chel giorno i ga volesto ricordarlo co la stessa zente che lu, par la giustissia e par la fraternità el ga regalà la so vita come Cristo su la Crose par tuta l'umanità.

El secondo martire moderno, don Ruggero Ruvoletto, el xe stà ricordà invense el 19 setembre ne la cesa de la "Casa della Divina Provvidenza" co na gran cerimonia, a la presensa de i quattro Vescovi che i lo gheva vudo come prete ne le so diocesi brasiliane.

Don Ruggero, el nasse a Galta de Vigonovo nel 1957, consacrà prete ne l'82 dal Vescovo Franceschi el ghe fa da segretario fin a la so morte. Don Ruggero, qua a Padova, el se òcupa par qualche ano ne la Pastorale del Lavoro diventando dopo Direttore del Centro Missionario Diocesano par oto ani. Nel 2003 el vien mandà missionario in Brasile dove el diventa pàroco su na comunità a Mangaritiba, vissin a Rio. Dopo qualche ano el se rende disponibile par na presensa missionaria a Manaus,

su na parochia particolarmente pericolosa e, proprio là, el 19 setembre de l'ano passà (2009), el vien copà ne la so càmara da un tosato, par pochi schei che 'l gheva nel comodin. I lo trova la mattina drìo, insenocià, tacà al so leto, copà da na rivoltelà su la nuca e, la so càmara, la xe diventà un posto sacro dove, la zente del posto, va a ricordarlo e a pregare par la so intercession.

La Diocesi de Padova, lo ga ricordà a un ano dal so sacrificio, stanpando un libreto, alegà a la Difesa del Popolo, el giornale diocesano, dove xe riportà de i so scriti, riflession e létere che lu gheva scritto ai so amissi: lu stesso, se fa conòsare co le so parole e i so pensieri, da lèssare co devossion.

Sti do martiri "moderni" se ga impegnà sacrificàndose fin a morire pa i ultimi, lotando par la Giustissia co la "G" granda, convinti che ogni dì fusse Nadale; do preti che ga credùo e combatùo par un Mondo Novo, dove l'amore, la comprension, l'atension par chi no ga gnente e vorìa èssare riconossù come òmeni anca lori.

Qualcuno scriveva che "La povertà è una violazione dei diritti umani": eco parcossa che a Nadale semo ciamài a pensarghe sora, proprio quando nialtri se preocupemo tanto, pensando a cossa regalarghe ai nostri fiò o nevodeti...

Luigi Frosi

Don Ruggero Ruvoletto.



Luigi Frosi